



An Bhruiséil, 22 Meán Fómhair 2025
(OR. en)

13077/25

**Comhad Idirinstitiúideach:
2025/0285 (NLE)**

PECHE 277

NÓTA CLÚDAIGH

ó:	Ardrúnaí an Choimisiúin Eorpaigh, arna s(h)íniú ag Martine DEPREZ, Stiúrthóir
dáta a fuarthas:	22 Meán Fómhair 2025
chuig:	Thérèse BLANCHET, Ardrúnaí Chomhairle an Aontais Eorpaigh
Uimh. an doic. ón gCoim.:	COM(2025) 509 final
Ábhar:	Togra le haghaidh RIALACHÁN ÓN gCOMHAIRLE lena socraítear na deiseanna iascaireachta le haghaidh stoic éisc áirithe agus grúpaí stoc éisc is infheidhme sa Mheánmhuir agus sa Mhuir Dhubh le haghaidh 2026

Gheobhaidh na toscaireachtaí i gceangal leis seo doiciméad COM(2025) 509 final.

Faoi iamh: COM(2025) 509 final



AN COIMISIÚN
EORPACH

An Bhruiséil, 22.9.2025
COM(2025) 509 final

2025/0285 (NLE)

Togra le haghaidh

RIALACHÁN ÓN gCOMHAIRLE

**lena socraítear na deiseanna iascaireachta le haghaidh stoic éisc áirithe agus grúpaí stoc
éisc is infheidhme sa Mheánmhuir agus sa Mhuir Dhubh le haghaidh 2026**

MEABHRÁN MÍNIÚCHÁIN

1. COMHTHÉACS AN TOGRA

• Forais agus cuspóirí an togra

Sna rialacháin uile maidir le deiseanna iascaireachta, ní mór teorainn a chur le saothrú stoc éisc ar leibhéal atá comhsheasmhach le cuspóirí foriomlána an comhbheartais iascaigh (CBI). Le Rialachán (AE) Uimh. 1380/2013 ó Pharlaimint na hEorpa agus ón gComhairle maidir leis an gComhbheartas Iascaigh ('Bunrialachán CBI')¹, déantar foráil maidir le teorainneacha gabhála agus iarrachta iascaireachta a shocrú chun a áirithiú go sathraítear acmhainn bhitheolaíoch na mara faoi dhálaí inbhuanaithe eacnamaíocha, comhshaoil agus sóisialta. I gcomhréir leis na cuspóirí sin, ghlac Parlaimint na hEorpa agus an Chomhairle Rialachán (AE) 2019/1022 lena mbunaítear plean ilbhliantúil le haghaidh stoic ghrinnill i Réigiún na Meánmhara Thiar².

Is é is cuspóir don togra seo le haghaidh Rialachán ón gComhairle deiseanna iascaireachta le haghaidh stoic áirithe agus grúpaí stoc áirithe sa Mheánmhuir agus sa Mhuir Dhubh a shocrú.

I gcás Réigiún na Meánmhara Thiar, socraítear leis an togra seo deiseanna iascaireachta le haghaidh stoic ghrinnill i gcomhréir leis an bplean ilbhliantúil. Sloinntear deiseanna iascaireachta i dtéarmaí uasiarracht iascaireachta incheadaithe le haghaidh na stoc uile. Ina theannta sin, socraítear uasteorainneacha gabhála le haghaidh séaclaí domhainmhara agus colmóirí a ghabhtar trí úsáid a bhaint as cineálacha sonracha trealaimh iascaireachta. Tá sé beartaithe na teorainneacha sin a leithdháileadh ar Bhallstáit Réigiún na Meánmhara Thiar (an Spáinn, an Fhrainc agus an Iodáil).

Thairis sin, tá sé beartaithe deiseanna iascaireachta a shocrú faoi chomhaontuithe a tugadh i gcrích laistigh den Choimisiún Ginearálta Iascaigh don Mheánmhuir (CGIM), eagraíocht réigiúnach bainistithe iascaigh atá freagrach as caomhnú agus bainistiú acmhainn bhitheolaíoch na mara sa Mheánmhuir agus sa Mhuir Dhubh. Tá an tAontas Eorpach ina chomhalta de CIGM, mar atá an Bhulgáir, an Ghréig, an Spáinn, an Fhrainc, an Chróit, an Iodáil, an Chipir, Málta, an Rómáin agus an tSlóivéin. Beidh na bearta arna nglacadh ag CIGM ina gceangal ar a chomhaltaí.

Ar deireadh, tá sé beartaithe cuóta uathrialach a shocrú le haghaidh shaláin Mhuir Mheoid chun méadú breise ar an ráta básmhairachta iascaigh, i gcomparáid leis na leibhéil atá ann faoi láthair, a sheachaint.

• Comhsheasmhacht le forálacha beartais atá sa réimse beartais cheana

Tá na bearta atá beartaithe comhsheasmhach le cuspóirí agus rialacha CBI.

¹ Rialachán (AE) Uimh. 1380/2013 ó Pharlaimint na hEorpa agus ón gComhairle an 11 Nollaig 2013 maidir leis an gComhbheartas Iascaigh, lena leasaítear Rialachán (CE) Uimh. 1954/2003 ón gComhairle agus Rialachán (CE) Uimh. 1224/2009 ón gComhairle agus lena n-aisghairtear Rialachán (CE) Uimh. 2371/2002 ón gComhairle, Rialachán (CE) Uimh. 639/2004 ón gComhairle agus Cinneadh 2004/585/CE ón gComhairle (IO L 354, 28.12.2013, lch. 22), ELI: <http://data.europa.eu/eli/reg/2013/1380/oj>

² Rialachán (AE) 2019/1022 ó Pharlaimint na hEorpa agus ón gComhairle an 20 Meitheamh 2019 lena mbunaítear plean ilbhliantúil do na hiascaigh a shaothraíonn stoic ghrinnill sa Mheánmhuir Thiar agus lena leasaítear Rialachán (AE) Uimh. 508/2014 (IO L 172, 26.6.2019, lch. 1), ELI: <http://data.europa.eu/eli/reg/2019/1022/oj>.

- **Comhsheasmhacht le beartais eile de chuid an Aontais**

Tá na bearta atá beartaithe comhsheasmhach le beartais eile de chuid an Aontais, go háirithe i réimse an chomhshaoil.

2. BUNÚS DLÍ, COIMHDEACHT AGUS COMHRÉIREACHT

- **Bunús dlí**

Is é Airteagal 43(3) den Chonradh ar Fheidhmiú an Aontais Eorpaigh (CFAE) an bunús dlí atá leis an togra seo.

- **Coimhdeacht (i gcás inniúlacht neamheisiach)**

Tagann an togra faoi inniúlacht eisiach an Aontais, dá dtagraítear in Airteagal 3(1)(d) CFAE. Dá bhrí sin, níl feidhm ag prionsabal na coimhdeachta.

- **Comhréireacht**

Leis an togra, leithdháiltear deiseanna iascaireachta ar na Ballstáit i gcomhréir le cuspóirí Bhunrialachán CBI, leis an bplean ilbhliantúil le haghaidh stoic ghrinnill i Réigiún na Meánmhara Thiar agus le torthaí chruinniú bliantúil CGIM. Faoi Airteagail 16(6) agus (7) agus Airteagal 17 de Bhunrialachán CBI, is faoi na Ballstáit atá sé a chinneadh conas a dhéanfar na deiseanna iascaireachta atá ar fáil a dháileadh ar shoithí iascaireachta a bhfuil a mbratach ar foluain acu ar bhonn critéir áirithe. Tugann sé sin discréd mhór do na Ballstáit na deiseanna iascaireachta a dháileadh i gcomhréir lena samhlacha sóisialta agus eacnamaíocha.

- **An rogha ionstraime**

Meastar gur rialachán atá san ionstraim is iomchuí toisc gur féidir ceanglais a shocrú leis a bhfuil feidhm dhíreach acu maidir leis na Ballstáit agus leis na hoibreoirí eacnamaíocha lena mbaineann. Cuideoidh sé sin lena áirithiú go gcuirfear chun feidhme ar bhealach tráthúil agus comhchuibhithe iad, rud a fhágfaidh go mbeidh níos mó deimhneachta dlíthiúla ann.

3. TORTHAÍ AR MHEASTÓIREACHTAÍ EX POST, AR CHOMHAIRLIÚCHÁIN LEIS NA PÁIRTITHE LEASMHARA AGUS AR MHEASÚNUITHE TIONCHAIR

- **Meastóireachtaí ex post/seiceálacha oiriúnachta ar an reachtaíocht atá ann cheana**

Ní bhaineann le hábhar.

- **Comhairliúcháin leis na páirtithe leasmhara**

Chuathas i gcomhairle leis na páirtithe leasmhara trí bhíthin na Teachtaireachta ón gCoimisiún chuig Parlaimint na hEorpa agus chuig an gComhairle an 6 Meitheamh 2025 dar teideal – ‘*Iascaireacht inbhuanaithe san Aontas Eorpach: staid na himeartha agus treoshuíomhanna le haghaidh 2026*’ (COM(2025) 296 final)³.

³ <https://eur-lex.europa.eu/legal-content/GA/TXT/PDF/?uri=CELEX:52025DC0296>

- **Bailiú agus úsáid saineolais**

Tá an measúnú ar staid na stoc sa Mheánmhuir agus sa Mhuir Dhubh bunaithe ar an obair is déanaí a rinne an Coiste Eolaíoch, Teicniúil agus Eacnamaíoch um Iascach (CETEI) agus Coiste Comhairleach Eolaíoch CGIM maidir le hIascaigh.

- **Measúnú tionchair**

Is le hAirteagal 43(3) CFAE a shocraítear raon feidhme na rialachán maidir le deiseanna iascaireachta.

A mhéid a bhaineann leis na deiseanna iascaireachta arna mbunú ag CGIM sa Mheánmhuir agus sa Mhuir Dhubh, beartaítear leis an togra seo bearta a comhaontaíodh go hidirnáisiúnta a chur chun feidhme. Déileáiltear le haon ghné a bhaineann le measúnú a dhéanamh ar na tionchair a d'fhéadfadh a bheith ag na deiseanna iascaireachta le linn ullmhú agus sheoladh na caibidlíochta idirnáisiúnta ar faoina cuimsiú a dhéantar deiseanna iascaireachta an Aontais a chomhaontú le tríú páirtithe.

Is léiriú é an togra ní hamháin ar an inní ghearrthéarmach, ach ar chur chuige níos fadtéarmaí freisin lena ndéantar an iarracht iascaireachta a chur in oiriúint de réir a chéile do leibhéil inbhuanaithe fhadtéarmacha.

- **Oiriúnacht rialála agus simpliú**

Ní bhaineann le hábhar.

- **Ceartha bunúsacha**

Leis an togra urramaítear ceartha bunúsacha, agus go háirithe na ceartha sin a aithnítear i gCairt um Chearta Bunúsacha an Aontais Eorpaigh.

4. IMPLEACHTAÍ BUISÉADACHA

Níl aon impleacht bhuiséadach ag an togra.

5. EILIMINTÍ EILE

- **Pleananna cur chun feidhme, agus socruithe faireacháin, meastóireachta agus tuairiscithe**

Déanfar faireachán agus comhlíonadh a áirithiú i gcomhréir le Rialachán (CE) Uimh. 1224/2009 ón gComhairle⁴.

⁴ Rialachán (CE) Uimh. 1224/2009 ón gComhairle an 20 Samhain 2009, lena mbunaítear córas rialaithe de chuid an Aontais chun comhlíonadh rialacha an Chomhbheartais Iascaigh a áirithiú, lena leasaítear Rialacháin (CE) Uimh. 847/96, (CE) Uimh. 2371/2002, (CE) Uimh. 811/2004, (CE) Uimh. 768/2005, (CE) Uimh. 2115/2005, (CE) Uimh. 2166/2005, (CE) Uimh. 388/2006. (CE) Uimh. 509/2007, (CE) Uimh. 676/2007, (CE) Uimh. 1098/2007, (CE) Uimh. 1300/2008 agus (CE) Uimh. 1342/2008 agus lena n-aisghairtear Rialacháin (CEE) Uimh. 2847/93, (CE) Uimh. 1627/94 agus (CE) Uimh. 1966/2006 (IO L 343, 22.12.2009, lch. 1), ELI: <http://data.europa.eu/eli/reg/2009/1224/oj>.

- **Míniúchán mionsonraithe ar fhorálacha sonracha an togra**

Beartaítear leis an togra deiseanna iascaireachta le haghaidh 2026 a shocrú le haghaidh stoic áirithe nó grúpaí stoc áirithe sa Mheánmhuir agus sa Mhuir Dhubh, a leagtar amach ar bhealach níos mine thíos:

A. Plean Bainistíochta Ilbhliantúil Réigiún na Meánmhara Thiar a chur chun feidhme

Faoin bplean ilbhliantúil um iascaigh ghrinnill i Réigiún na Meánmhara Thiar, tá an Chomhairle leis an uasiarracht iascaireachta incheadaithe a shocrú, de réir an Bhallstáit, le haghaidh trálaeir a dhéanann iascaireacht ar stoic ghrinnill i Réigiún na Meánmhara Thiar, le haghaidh gach grúpa iarrachta iascaireachta, agus le haghaidh na stocgrúpaí in Iarscríbhinn I a ghabhann leis an bplean.

Ina theannta sin, leagtar amach sa phlean spriocanna agus bearta chun bainistiú fadtéarmach a dhéanamh ar stoic a chumhdaítear leis. Ó 2025 ar aghaidh, tá céim fhadtéarmach an phlean bainistíochta ilbhliantúil ar siúl ina mbeidh feidhm ag raonta MSY (uastáirgeacht inbhuanaithe), de réir Airteagail 4 agus 6. Dá bhrí sin, cloífidh na deiseanna iascaireachta le haghaidh 2026 leis na raonta arna soláthar ag CETEI agus a úsáidfear chun meastóireacht a dhéanamh ar na roghanna bainistíochta.

Thairis sin, déantar foráil le hAirteagal 7(5) den phlean ilbhliantúil maidir leis an bhféidearthacht go bhféadfar an córas iascaireachta le haghaidh trálaer a fhorlíonadh le huasiarracht iascaireachta incheadaithe le haghaidh trealamh iascaireachta eile seachas tráil ar bhonn comhairle eolaíoch agus chun luach an ráta básmhaireachta iascaigh mheasta a bhaint amach, a thugann agus a choinníonn ar bun, le patrún iascaireachta ar leith agus faoi mheándálaí comhshaoil reatha, an uastáirgeacht fhadtéarmach (Fmsy).

In 2024, moladh sa chomhairle eolaíoch ó CETEI agus ó Choiste Comhairleach Eolaíoch CIGM araon gur cheart gníomhaíocht ghasa a dhéanamh agus fíorlaghdú ar an ráta básmhaireachta iascaigh a ghlacadh chun MSY a bhaint amach le haghaidh stoic ghrinnill i Réigiún na Meánmhara Thiar. Rinneadh rósaothrú ar stoic colmóirí agus ar stoc amháin de ghliomach na hIorua chomh mór sin gur mheas CETEI iad a bheith ar leibhéal faoi bhun an B_{lim} , is é sin an pointe tagartha teorann, arna shloinneadh mar bhithmhais stoic sceite agus dá bhforáiltear sa chomhairle eolaíoch is fearr atá ar fáil, go háirithe ó CETEI, nó ó chomhlacht eolaíoch neamhspleách den chineál céanna arna shainiú ar leibhéal an Aontais nó ar an leibhéal idirnáisiúnta, ar faoina bhun is féidir laghdú a bheith ar acmhainneacht atáirgthe.

Mhol CETEI (STECF-24-10 agus PLEN-24-03), mar a mhol i mblianta roimhe, go raibh gá le cur chuige iomlánaíoch, lena gcomhcheanglófaí bearta iarrachta le haghaidh trálaer, báid spiléireachta agus teorainneacha gabhála le haghaidh séaclaí domhainmhara agus le haghaidh colmóirí a ghabhtar le heangacha geolbhaigh agus traimlí, chun an ráta básmhaireachta iascaigh a laghdú go práinneach, go háirithe i gcás stoic colmóirí, ghliomaigh na hIorua agus séaclaí domhainmhara. Cuireadh an cur chuige sin chun feidhme le Rialachán (AE) 2022/110⁵, (AE) 2023/195⁶, (AE) 2024/259⁷ agus (AE) 2025/219⁸ ón gComhairle lena

⁵ Rialachán (AE) 2022/110 ón gComhairle an 27 Eanáir 2022 lena socraítear deiseanna iascaireachta le haghaidh 2022 maidir le stoic éisc agus grúpaí stoc éisc áirithe is infheidhme sa Mheánmhuir agus sa Mhuir Dhubh (IO L 21, 31.1.2022, lch. 165), ELI: <http://data.europa.eu/eli/reg/2022/110/oj>.

⁶ Rialachán (AE) 2023/195 ón gComhairle an 30 Eanáir 2023 lena socraítear le haghaidh 2023 na deiseanna iascaireachta le haghaidh stoic áirithe agus grúpaí stoc éisc is infheidhme sa Mheánmhuir agus sa Mhuir Dhubh, agus lena leasaítear Rialachán (AE) 2022/110 a mhéid a bhaineann le deiseanna

socraítear na deiseanna iascaireachta sa Mheánmhuir agus sa Mhuir Dhubh le haghaidh 2022, 2023, 2024 agus 2025 faoi seach, agus tá sé beartaithe ag an gCoimisiún leanúint den chur chuige sin a chur chun feidhme in 2026, d'ainneoin dhul in éag an chórais idirthréimhsigh arna bhunú le hAirteagal 7(3) den phlean ilbhliantúil. Is amhlaidh atá toisc go ndéantar foráil go ginearálta le hAirteagal 7(1)(e) de Bhunrialachán CBI go '*[bh]féadfar (...) bearta maidir le deiseanna iascaireachta a leagan síos agus a leithdháileadh a áireamh sna bearta chun acmhainní bitheolaíocha na mara a chaomhnú agus a shaothrú ar bhealach inbhuanaithe*', lena n-áirítear, dá bhrí sin, teorainneacha gabhála.

Is le 'pm' (pro memoria) a mharcáiltear roinnt deiseanna iascaireachta sa togra seo toisc nach raibh an chomhairle eolaíoch ó CETEI ar fáil go fóill nuair a glacadh an togra. A luaithe a bheidh an chomhairle is déanaí ó CETEI ar fáil, déanfar an togra seo a thabhairt cothrom le dáta trí bhíthin páipéar leathoifigiúil ó sheirbhísí an Choimisiúin.

Thairis sin, chun úsáid trealaimh roghnaithe a chur chun cinn agus chun limistéir choiscthe éifeachtúla a bhunú chun éisc óga agus sceithirí a chosaint, coinnítear ar bun leis an togra seo an sásra cúitimh a bunaíodh den chéad uair in 2022, agus saineofar ann na sonraí sonracha a luaithe a bheidh an chomhairle is déanaí ó CETEI ar fáil.

B. Bearta CGIM is infheidhme sa Mheánmhuir

- uasacmhainneacht cabhlaigh agus reo feistí comhthiomsaithe éisc (FADanna) in aghaidh an tsoithigh, chomh maith le huasteorainneacha gabhála le haghaidh doráid choiteanna sa Mheánmhuir ina hiomláine faoi phlean bainistíochta ilbhliantúil CGIM 2023 (folimistéir gheografacha CGIM (FLGanna) 1 go 27);

Ag an gcrúinniú bliantúil i mí na Samhna 2022, ghlac CGIM moladh chun na teorainneacha gabhála le haghaidh doráid choiteanna a shocrú le haghaidh 2026. Mar ab amhlaidh in 2025, tá sé beartaithe ag an gCoimisiún leanúint de chur chun feidhme na huasteorann acmhainneachta cabhlaigh le haghaidh FADanna a dhíríonn ar an stoc dorád coiteann. Tá an uasteorann acmhainneachta sin bunaithe ar an acmhainneacht a tuairiscíodh do CGIM in 2019.

- uasleibhéil gabhálacha le haghaidh ainseabhaithe agus sairdíní agus bearta le haghaidh stoic peiligeach beag faoi phlean bainistíochta ilbhliantúil CGIM 2021 (FLGanna 17 agus 18):

Ag an gcrúinniú bliantúil a bheidh ag CGIM i mí na Samhna 2025, tá sé le moladh nua a ghlacadh chun na teorainneacha gabhála le haghaidh peiligigh bheaga a shocrú le haghaidh 2026. Mar ab amhlaidh in 2025 tá sé beartaithe ag an gCoimisiún leanúint de chur chun feidhme na huasteorann acmhainneachta cabhlaigh le haghaidh soithí peas-saighne agus trálaeir peiligeach a dhíríonn ar stoic peiligeach beag. Tá an uasteorann acmhainneachta sin bunaithe ar an acmhainneacht a tuairiscíodh do CGIM in 2014.

- bearta maidir le stoic ghrinnill faoi phlean bainistíochta ilbhliantúil CIGM 2019 le haghaidh speicis ghrinnill i Muir Aidriad (FLGanna 17 agus 18):

iascaireachta is infheidhme sa Mheánmhuir agus sa Mhuir Dhubh le haghaidh 2022 (IO L 28, 31.1.2023, lch. 220), ELI: <http://data.europa.eu/eli/reg/2023/195/oj>.

⁷ Rialachán (AE) 2024/259 ón gComhairle an 10 Eanáir 2024 lena socraítear le haghaidh 2024 na deiseanna iascaireachta le haghaidh stoic áirithe agus grúpaí stoc éisc is infheidhme sa Mheánmhuir agus sa Mhuir Dhubh (IO L, 2024/259, 11.1.2024, ELI: <http://data.europa.eu/eli/reg/2024/259/oj>).

⁸ Rialachán (AE) 2025/219 ón gComhairle an 30 Eanáir 2025 lena socraítear le haghaidh 2025 na deiseanna iascaireachta le haghaidh stoic éisc áirithe agus grúpaí stoc éisc is infheidhme sa Mheánmhuir agus sa Mhuir Dhubh (IO L, 2025/219, 4.2.2025, ELI: <http://data.europa.eu/eli/reg/2025/219/oj>).

Ag an gcruinniú bliantúil a bheidh ag CGIM i mí na Samhna 2025, tá sé le moladh nua a ghlacadh chun an iarracht iascaireachta le haghaidh soithí tráil dobharchú (OTB) agus le haghaidh soithí tráil bhíoma (TBB) a bhunú le haghaidh 2026 a rannchuideodh le MSY a bhaint amach in 2026. Tá an uasacmhainneacht cabhlaigh atá beartaithe i gcomhréir leis an acmhainneacht a tuairiscíodh do CGIM le haghaidh 2025 nó le haghaidh mheán 2015-2017.

- uasteorainneacha gabhála le haghaidh rós-séaclaí domhainmhara, agus an uasiarracht iascaireachta incheadaithe agus acmhainneacht cabhlaigh le haghaidh colmóirí i gCaolas na Sicile faoi phlean bainistíochta ilbhliantúil CIGM 2022 (FLGanna 12 go 16);

Ag an gcruinniú bliantúil a bheidh ag CGIM i mí na Samhna 2025, tá sé le moladh nua a ghlacadh chun a bhunú le haghaidh 2026 na huasteorainneacha gabhála le haghaidh rós-séaclaí domhainmhara, agus uasiarracht iascaireachta incheadaithe agus acmhainneacht cabhlaigh le haghaidh colmóirí i gCaolas na Sicile.

- uasacmhainneacht cabhlaigh agus teorainneacha gabhála le haghaidh séaclaí móra dearga agus séaclaí gorma agus dearga i gCaolas na Sicile (FLGanna 12 go 16), sa Mhuir Iónach (FLGanna 19 go 21) agus i Muir na Leiveainte (FLGanna 24 go 27) faoi na pleananna bainistíochta ilbhliantúla CIGM ábhartha;

Ag an gcruinniú bliantúil a bheidh ag CGIM i mí na Samhna 2025, tá sé le moltaí nua a ghlacadh chun na huasteorainneacha gabhála le haghaidh séaclaí domhainmhara i gCaolas na Sicile, sa Mhuir Iónach agus i Muir na Leiveainte a bhunú le haghaidh 2026. Mar ab amhlaidh in 2025, tá sé beartaithe ag an gCoimisiún leanúint de chur chun feidhme na n-uasteorainneacha acmhainneachta le haghaidh na gcabhlach a dhíríonn ar shéaclaí domhainmhara faoi na pleananna ilbhliantúla CGIM lena mbaineann.

- bearta le haghaidh deargáin i Muir Alboran faoin bplean bainistíochta ilbhliantúil CGIM (FLGanna 1-3)

Áirítear sa togra sraith ionadchoinneálaithe, le haghaidh stoic a bhfuil bearta idirthréimhseacha CGIM ag dul in éag ina leith ag deireadh 2025 nó chun teorainneacha bliantúla gabhála agus iarrachta a bhunú faoi chéim bhuan de na pleananna bainistíochta agus ar cheart do CGIM bearta nua a ghlacadh ina leith ag an gcruinniú bliantúil a bheidh aige amach anseo

A luaitear a tharlóidh amach anseo an cruinniú bliantúil de CGIM, déanfar an togra a thabhairt cothrom le dáta trí bhíthin páipéar leathoifigiúil ó sheirbhísí an Choimisiúin.

C. Bearta CGIM is infheidhme sa Mhuir Dhubh

1. cuóta uathrialaitheach le haghaidh salán, ar bhonn comhairle eolaíoch;
2. an GII agus an leithdháileadh cuótaí le haghaidh turbaird faoi phlean bainistíochta ilbhliantúil CGIM 2017 um iascaigh turbard, lena gcuirtear chun feidhme Moladh GFCM/43/2019/3 (FLG 29), arna leasú le Moladh GFCM/47/2024/8.

Is cuid den togra seo iad na bearta a bhfuil nasc feidhmiúil acu leis na deiseanna iascaireachta, (e.g. cosc le linn an tséasúir sceite), ós rud é nach bhféadfaí na deiseanna iascaireachta a bhunú ar na leibhéil chéanna gan na tréimhsí coiscthe sin (mar shampla le haghaidh turbaird sa Mhuir Dhubh). D'fhéadfadh éagsúlacht a bheith i méid na dtréimhsí coiscthe, ag brath ar staid an stoic arna measúnú sa chomhairle eolaíoch.

Togra le haghaidh

RIALACHÁN ÓN gCOMHAIRLE

lena socraítear na deiseanna iascaireachta le haghaidh stoic éisc áirithe agus grúpaí stoc éisc is infheidhme sa Mheánmhuir agus sa Mhuir Dhubh le haghaidh 2026

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 43(3) de,

Ag féachaint don togra ón gCoimisiún Eorpach,

De bharr an mhéid seo a leanas:

- (1) Tá an Chomhairle le bearta a ghlacadh maidir le deiseanna iascaireachta a shocrú agus a leithdháileadh, lena n-áirítear coinníollacha áirithe a bhfuil nasc feidhmiúil acu leis na deiseanna iascaireachta sin, de réir mar is iomchuí. Foráiltear le hAirteagal 16(1) de Rialachán (AE) Uimh. 1380/2013 go bhfuil deiseanna iascaireachta le leithdháileadh ar na Ballstáit ar bhealach lena n-áirithítear cobhsaíocht choibhneasta ghníomhaíochtaí iascaireachta gach Ballstáit le haghaidh gach stoic éisc nó iascaigh. Le hAirteagal 16(4) den Rialachán sin, foráiltear go bhfuil deiseanna iascaireachta le socrú i gcomhréir le cuspóirí an Chomhbheartais Iascaigh (CBI) a leagtar amach in Airteagal 2(2) den Rialachán sin.
- (2) Dá bhrí sin, i gcomhréir le Rialachán (AE) Uimh. 1380/2013, ba cheart na deiseanna iascaireachta a shocrú ar bhonn na comhairle eolaíche atá ar fáil, agus gnéithe bitheolaíocha agus socheacnamaíocha á gcur san áireamh, agus cóir chothrom idir earnálacha iascaireachta á háirithiú an tráth céanna, chomh maith leis na tuairimí a cuireadh in iúl le linn comhairliúcháin leis na páirtithe leasmhara.
- (3) Ag an 47ú cruinniú bliantúil a bhí ag an gCoimisiún Ginearálta Iascaigh don Mheánmhuir (CGIM) in 2024, ghlac sé Moladh GFCM/47/2024/1 lena mbunaítear bearta bainistíochta fadtéarmacha don eascann Eorpach (*Anguilla anguilla*) mar a fhoráiltear Moladh GFCM/46/2023/16 maidir le plan bainistíochta fadtéarmach don eascann Eorpach ((folimistéir gheografacha CGIM ('FLGanna CGIM') 1 go 27). Le Moladh GFCM/47/2024/1, coinnítear ar bun, le haghaidh 2026, an tréimhse choiscthe 6 mhí le haghaidh iascaigh thráchtála agus toirmeasc ar an iascach áineasa. Thairis sin, leis an Moladh sin, déantar gníomhaíochtaí iascaireachta tráchtála le haghaidh eascanna gloine a theorannú do thréimhse 2 mhí agus ní cheadaítear iascaireacht den sórt sin ach amháin faoi choinníollacha áirithe. Tá feidhm le bheith ag na bearta sin maidir le huiscí muirí uile na Meánmhara agus fionnuiscí, chomh maith le huiscí goirt, lena n-áirítear inbhir, murlaigh chósta agus uiscí trasdultacha, i gcomhréir leis an Moladh sin. Ba cheart na bearta sin a chur chun feidhme i ndlí an Aontais.
- (4) Ag an 47ú cruinniú bliantúil a bhí ag CGIM in 2024, ghlac sé Moladh GFCM/47/2024/2 freisin lena mbunaítear bearta fadtéarmacha maidir le saothrú inbhuanaithe coiréalaigh dheirg (*Corallium rubrum*) mar a fhoráiltear le Moladh GFCM/43/2019/4 maidir le plan bainistíochta um shaothrú inbhuanaithe coiréalaigh

dheirg sa Mheánmhuir (FLGanna CGIM 1 go 27). Le Moladh GFCM/47/2024/2, coinnítear ar bun le haghaidh 2026 reo na hiarrachta iascaireachta arna sloinneadh mar líon uasta údaruithe iascaireachta agus teorainneacha saothraithe maidir le coiréalach dearg. Ba cheart na bearta sin a chur chun feidhme i ndlí an Aontais.

- (5) Ag an 46ú cruinniú bliantúil a bhí ag CGIM in 2023, ghlac sé Moladh GFCM/46/2023/14 maidir le plean bainistíochta ilbhliantúil um shaothrú inbhuanaithe dorád coiteann (*Coryphaena hippurus*) sa Mheánmhuir (FLGanna CGIM 1 go 27). Leis an Moladh sin, tugadh isteach, i gcomhréir le cur chuige an réamhchúraim agus le haghaidh na hidirthréimhse 2024 go 2026, uasteorainn acmhainneachta cabhlaigh, reo i dtaca le hacmhainneacht feistí comhthiomsaithe éisc (FADanna) in aghaidh an tsoithigh agus teorainn ghabhála. Maidir leis an iascach áineasa, foráiltear leis an Moladh sin freisin go bhfuil teorainn ghabhála laethúil le hurramú. Cuireadh na bearta sin chun feidhme i ndlí an Aontais ó bhí 2024 ann trí bhíthin Rialachán (AE) 2024/259 ón gComhairle² agus Rialachán (AE) 2025/219 ón gComhairle³. Ba cheart leanúint de na bearta sin a chur chun feidhme i ndlí an Aontais le haghaidh 2026.
- (6) Le Rialachán (AE) 2019/1022 ó Pharlaimint na hEorpa agus ón gComhairle⁴ bunaíodh plean ilbhliantúil do na hiascaigh a shaothraíonn stoic ghrinnill sa Mheánmhuir Thiar (FLGanna CGIM 1, 2, 5, 6, 7, 8, 9, 10 agus 11). Leagtar amach sa phlean sin spriocanna agus bearta maidir le caomhnú fadtéarmach agus saothrú inbhuanaithe na stoc a chumhdaítear leis. Áirítear leis sin bearta chun an uastáirgeacht inbhuanaithe (MSY) le haghaidh spriocstoc a bhaint amach agus a choinneáil ar bun, rud a áiríthíonn go ndéanfaidh saothrú acmhainn bhitheolaíoch na mara pobail na speiceas atá á saothrú a athbhunú agus a choinneáil ar bun os cionn leibhéil ar a bhfuiltear in ann an MSY a tháirgeadh.
- (7) I gcomhréir le hAirteagal 4(1) de Rialachán (AE) 2019/1022, ba cheart deiseanna iascaireachta le haghaidh stoic a liostaítear in Airteagal 1(2) de Rialachán (AE) 2019/1022 a shocrú laistigh de raon luachanna an ráta básmhaireachta iascaigh as a n-eascaíonn MSY (raonta F_{MSY}), nó ar leibhéal níos ísle, agus i gcomhréir leis na coimircí dá bhforáiltear sa Rialachán sin. Saináithníodh na raonta F_{MSY} sa chomhairle ábhartha ó CETEI. I gcás nach mbeidh faisnéis eolaíoch leormhaith ar fáil, ba cheart deiseanna iascaireachta le haghaidh na stoc dá dtagraítear in Airteagal 1(2) agus in Airteagal 1(3) den Rialachán sin a shocrú i gcomhréir leis an gcur chuige réamhchúraim i leith bainistiú iascaigh, i gcomhréir le hAirteagal 4(6) den Rialachán sin.
- (8) Thairis sin, tá deiseanna iascaireachta le sloinneadh, ar thaobh, mar uasiarracht iascaireachta incheadaithe le haghaidh trálaer agus báid spiléireachta, arna socrú i gcomhréir leis an gcóras iarrachta iascaireachta a leagtar síos in Airteagal 7 de Rialachán (AE) 2019/1022, agus, ar an taobh eile, mar uasteorainneacha gabhála le

² Rialachán (AE) 2024/259 ón gComhairle an 10 Eanáir 2024 lena socraítear le haghaidh 2024 na deiseanna iascaireachta le haghaidh stoic áirithe agus grúpaí stoc éisc is infheidhme sa Mheánmhuir agus sa Mhuir Dhubh, IO L, 2024/259, 11.1.2024, ELI: <http://data.europa.eu/eli/reg/2024/259/oj>.

³ Rialachán (AE) 2025/219 ón gComhairle an 30 Eanáir 2025 lena socraítear le haghaidh 2025 na deiseanna iascaireachta le haghaidh stoic éisc áirithe agus grúpaí stoc éisc is infheidhme sa Mheánmhuir agus sa Mhuir Dhubh, IO L, 2025/219, 4.2.2025, ELI: <http://data.europa.eu/eli/reg/2025/219/oj>.

⁴ Rialachán (AE) 2019/1022 ó Pharlaimint na hEorpa agus ón gComhairle an 20 Meitheamh 2019 lena mbunaítear plean ilbhliantúil do na hiascaigh a shaothraíonn stoic ghrinnill sa Mheánmhuir Thiar agus lena leasaítear Rialachán (AE) Uimh. 508/2014, IO L 172, 26.6.2019, lch. 1, ELI: <http://data.europa.eu/eli/reg/2019/1022/oj>.

haghaidh séaclaí gorma agus dearga (*Aristeus antennatus*) agus séaclaí móra dearga (*Aristaeomorpha foliacea*) in uisce doimhne, arna socrú uile i gcomhréir le comhairle eolaíoch agus Airteagal 16(4) de Rialachán (AE) Uimh. 1380/2013.

- (9) [IONADCHOINNEÁLAÍ Réigiún na Meánmhara Thiar CETEI comhairle iarracht le haghaidh trálaer, báid spiléireachta agus teorainneacha gabhála le haghaidh séaclaí domhainmhara]
- (10) Chun úsáid roghnaíocht trealaimh iascaireachta a chur chun cinn agus chun limistéir choiscthe éifeachtúla a bhunú chun éisc óga agus sceithirí a chosaint, le Rialachán (AE) 2022/110 ón gComhairle⁵, bunaíodh sásra cúitimh i ndáil leis an gcóras iarrachta le haghaidh trálaer. [IONADCHOINNEÁLAÍ comhairle ó CETEI].
- (11) I gcomhréir le hAirteagal 6 de Rialachán (AE) 2019/1022, i gcás ina léireoidh an chomhairle eolaíoch go bhfuil bithmhais stoic sceite aon cheann de na stoic éisc dá dtagraítear in Airteagal 1(2) den Rialachán sin faoi bhun an phointe tagartha réamhchúraim i dtaca le bith bithmhais (BPA) nó atá faoi bhun an phointe tagartha teorann i dtaca le bithmhais (BLIM), tá bearta ceartaitheacha le déanamh chun a áirithiú go ndéanfar leibhéil an stoic éisc a athbhunú go tapa os cionn na leibhéil atá in ann MSY a tháirgeadh.
- (12) Ag an 44ú cruinniú bliantúil a bhí ag CGIM in 2021, ghlac sé Moladh GFCM/44/2021/20 maidir le plan bainistíochta ilbhliantúil um shaothrú inbhuanaithe stoc peiligeach beag i Muir Aidriad (FLGanna CGIM 17 agus 18), moladh lenar tugadh isteach ó 2022 go dtí 2029 uasleibhéal gabhálacha agus uasteorainn ghaolmhar acmhainneachta cabhlaigh le haghaidh soithí peas-saighne agus trálaeir peiligeach a dhíríonn ar pheiligigh bheaga. Ba cheart na bearta sin a bhaineann le 2026 a chur chun feidhme i ndlí an Aontais.
- (13) [IONADCHOINNEÁLAÍ CGIM 48 Muir Aidriad peiligeach beag].
- (14) Ag an 43ú cruinniú bliantúil a bhí ag CGIM in 2019, ghlac sé Moladh GFCM/43/2019/5 maidir le plan bainistíochta ilbhliantúil um iascaigh ghrinnill inbhuanaithe i Muir Aidriad (FLGanna CGIM 17 agus 18), moladh lenar tugadh isteach córas iarrachta iascaireachta agus uasteorainn acmhainneachta cabhlaigh le haghaidh stoic ghrinnill áirithe, mar aon le hoibleagáid Fmsy a bhaint amach le haghaidh na bpríomh-stoc in 2026. Dá bhrí sin, ba cheart na bearta sin a bhaineann le 2026 a chur chun feidhme i ndlí an Aontais.
- (15) [IONADCHOINNEÁLAÍ CGIM 48 Muir Aidriad grinneall].
- (16) Agus saintréithe chabhlach na Slóivéine agus an tionchar beag a bhíonn aige ar stoic peiligeach beag agus stoic ghrinnill á gcur san áireamh, agus i gcomhréir le mír 13 de Mholadh GFCM/43/2019/5, is iomchuí na patrúin iascaireachta atá ann cheana a chaomhnú agus rochtain chabhlach na Slóivéine a áirithiú ar leithdháileadh íosta iarrachta le haghaidh stoic ghrinnill.
- (17) Ag an 45ú cruinniú bliantúil a bhí ag CGIM in 2022, ghlac sé Moladh GFCM/45/2022/4 maidir le plan bainistíochta ilbhliantúil um shaothrú inbhuanaithe stoc grinnill i gCaolas na Sicile (FLGanna CGIM 12 go 16), lena n-aisghairtear Moltaí GFCM/44/2021/12 agus GFCM/42/2018/5. Le Moladh GFCM/45/2022/4, tugadh

⁵ Rialachán (AE) 2022/110 ón gComhairle an 27 Eanáir 2022 lena socráítear deiseanna iascaireachta le haghaidh 2022 maidir le stoic éisc agus grúpaí stoc éisc áirithe is infheidhme sa Mheánmhuir agus sa Mhuir Dhubh, IO L 21, 31.1.2022, lch. 165, ELI: <http://data.europa.eu/eli/reg/2022/110/oj>.

isteach córas iarrachta le haghaidh colmóirí Eorpacha agus teorainneacha gabhála le haghaidh rós-séaclaí domhainmhara (*Parapenaeus longirostris*), chomh maith le reo acmhainneachta iascaireachta. Ba cheart na bearta sin a bhaineann le 2026 a chur chun feidhme i ndlí an Aontais.

- (18) [IONADCHOINNEÁLAÍ CGIM 48 – fadú bliana le hidirthréimhse an phlean ilbhliantúil].
- (19) Ag an 45ú cruinniú bliantúil a bhí ag CGIM in 2022, ghlac sé Moladh GFCM/45/2022/5 maidir le plean bainistíochta ilbhliantúil um shaothrú inbhuanaithe stoc séaclaí móra dearga agus séaclaí gorma agus dearga i gCaolas na Sicile (FLGanna CGIM 12 go 16), lena n-aisghairtear Moltaí GFCM/44/2021/7 agus GFCM/43/2019/6. Le Moladh GFCM/45/2022/5, tugadh isteach teorainn ghabhála agus reo acmhainneachta iascaireachta. Ba cheart na bearta sin a bhaineann le 2026 a chur chun feidhme i ndlí an Aontais.
- (20) [IONADCHOINNEÁLAÍ CGIM 48 –fadú bliana le hidirthréimhse an phlean ilbhliantúil].
- (21) Ag an 45ú cruinniú bliantúil a bhí ag CGIM in 2022, ghlac sé Moladh GFCM/45/2022/6 maidir le plean bainistíochta ilbhliantúil um shaothrú inbhuanaithe stoc séaclaí móra dearga agus séaclaí gorma agus dearga sa Mhuir Iónach (FLGanna CGIM 19 go 21), lena n-aisghairtear Moltaí GFCM/44/2021/8 agus GFCM/42/2018/4. Le Moladh GFCM/45/2022/6, tugadh isteach teorainn ghabhála agus reo acmhainneachta iascaireachta. Ba cheart na bearta sin a bhaineann le 2026 a chur chun feidhme i ndlí an Aontais.
- (22) [IONADCHOINNEÁLAÍ CGIM 48 – fadú bliana le hidirthréimhse an phlean ilbhliantúil].
- (23) Ag an 45ú cruinniú bliantúil a bhí ag CGIM in 2022, ghlac sé Moladh GFCM/45/2022/7 maidir le plean bainistíochta ilbhliantúil um shaothrú inbhuanaithe stoc séaclaí móra dearga agus séaclaí gorma agus dearga i Muir na Leiveainte (FLGanna CGIM 24 go 27), lena n-aisghairtear Moltaí GFCM/44/2021/6 agus GFCM/42/2018/3. Le Moladh GFCM/45/2022/7, tugadh isteach teorainn ghabhála agus reo acmhainneachta iascaireachta. Ba cheart na bearta sin a bhaineann le 2026 a chur chun feidhme i ndlí an Aontais.
- (24) [IONADCHOINNEÁLAÍ CGIM 48 –bearta le haghaidh deargán].
- (25) Ar bhonn na comhairle eolaíche a chuir Meitheal CGIM maidir leis an Muir Dhubh ar fáil, ba cheart an cuóta atá ann faoi láthair le haghaidh salán (*Sprattus sprattus*) a choinneáil ar bun chun inbhuanaitheacht na stoc salán sa Mhuir Dhubh a áirithiú (FLG CGIM 29). Is iomchuí, mar sin, leanúint de chuóta uathrialach a shocrú le haghaidh an stoic sin.
- (26) Ag an 47ú cruinniú bliantúil a bhí ag CGIM in 2024, ghlac sé Moladh GFCM/47/2024/8 lena leasaítear Moltaí GFCM/43/2019/3 agus GFCM/41/2017/4 maidir le plean bainistíochta ilbhliantúil um iascaigh turbard (*Scophthalmus maximus*) sa Mhuir Dhubh (FLG CGIM 29). Le Moladh GFCM/47/2024/8, tugadh isteach gabháil iomlán incheadaithe (GII) réigiúnach nuashonraithe agus scéim leithdháilte cuótaí le haghaidh turbard. I gcomhréir le Moladh GFCM/41/2017/4, tá nasc feidhmiúil ag an tréimhse choiscthe 2 mhí agus an teorainn 180 lá iascaireachta in aghaidh na bliana leis na deiseanna iascaireachta. Ba cheart na bearta sin a bhaineann le 2026 a chur chun feidhme i ndlí an Aontais, ós rud é, in éagmais na mbearta sin, go gcaithfí an GII a shocrú ar leibhéal eile.

- (27) Tá úsáid na ndeiseanna iascaireachta atá ar fáil do shoithí iascaireachta de chuid an Aontais a leagtar amach sa Rialachán seo faoi réir Rialachán (CE) Uimh. 1224/2009 ón gComhairle⁶, agus go háirithe Airteagail 33 agus 34 den Rialachán sin, maidir le gabhálacha agus iarrachtaí iascaireachta a thaifeadadh agus fógra a thabhairt faoi shonraí i ndáil le hídíú deiseanna iascaireachta. Na cóid atá le húsáid ag na Ballstáit agus sonraí á gcur chuig an gCoimisiún maidir le stoic atá faoi réir an Rialacháin seo a thabhairt i dtír, is gá, dá bhrí sin na cóid sin a shonrú.
- (28) Ionas nach gcuirfear isteach ar ghníomhaíochtaí iascaireachta agus chun slí bheatha iascairí an Aontais a áirithiú, ba cheart feidhm a bheith ag an Rialachán seo ón 1 Eanáir 2026. Ar chúiseanna práinne, ba cheart an Rialachán seo a theacht i bhfeidhm an lá tar éis lá a fhoilsithe,

TAR ÉIS AN RIALACHÁN SEO A GHLACADH:

TEIDEAL I

FORÁLACHA GINEARÁLTA

Airteagal 1 **Raon feidhme**

1. Tá feidhm ag an Rialachán seo maidir le soithí iascaireachta de chuid an Aontais a fheidhmíonn sa Mheánmhuir agus sa Mhuir Dhubh agus a shaothraíonn na stoic éisc seo a leanas:
 - (a) an eascann Eorpach (*Anguilla anguilla*), coiréalach dearg (*Corallium rubrum*) agus an dorád coiteann (*Coryphaena hippurus*) sa Mheánmhuir;
 - (b) an séacla gorm agus dearg (*Aristeus antennatus*), an rós-séacla domhainmhara (*Parapenaeus longirostris*), an séacla mór dearg (*Aristaeomorpha foliacea*), an colmóir Eorpach (*Merluccius merluccius*), gliomach na hIorua (*Nephrops norvegicus*) agus an lannach riabhach (*Mullus barbatus*) sa Mheánmhuir Thiar;
 - (c) an t-ainseabhaí (*Engraulis encrasicolus*) agus an sairdín (*Sardina pilchardus*) i Muir Aidriad;
 - (d) an colmóir Eorpach (*Merluccius merluccius*), gliomach na hIorua (*Nephrops norvegicus*), an sól coiteann (*Solea solea*), an rós-séacla domhainmhara (*Parapenaeus longirostris*) agus an lannach riabhach (*Mullus barbatus*) i Muir Aidriad;
 - (e) an colmóir Eorpach (*Merluccius merluccius*) agus an rós-séacla domhainmhara (*Parapenaeus longirostris*) i gCaolas na Sicile;

⁶ Rialachán (CE) Uimh. 1224/2009 ón gComhairle an 20 Samhain 2009, lena mbunaítear córas rialaithe de chuid an Aontais chun comhlíonadh rialacha an Chomhbheartais Iascaigh a áirithiú, lena leasaítear Rialacháin (CE) Uimh. 847/96, (CE) Uimh. 2371/2002, (CE) Uimh. 811/2004, (CE) Uimh. 768/2005, (CE) Uimh. 2115/2005, (CE) Uimh. 2166/2005, (CE) Uimh. 388/2006, (CE) Uimh. 509/2007, (CE) Uimh. 676/2007, (CE) Uimh. 1098/2007, (CE) Uimh. 1300/2008 agus (CE) Uimh. 1342/2008 agus lena n-aisghairtear Rialacháin (CEE) Uimh. 2847/93, (CE) Uimh. 1627/94 agus (CE) Uimh. 1966/2006, IO L 343, 22.12.2009, lch. 1, ELI: <http://data.europa.eu/eli/reg/2009/1224/oj>.

- (f) an séacla mór dearg (*Aristaeomorpha foliacea*) agus an séacla gorm agus dearg (*Aristeus antennatus*) i gCaolas na Sicile, sa Mhuir Iónach agus i Muir na Leiveainte;
 - (g) an deargán (*Pagellus bogaraveo*) i Muir Alboran;
 - (h) an salán (*Sprattus sprattus*) agus an turbard (*Scophthalmus maximus*) sa Mhuir Dhubh.
2. Tá feidhm ag an Rialachán seo freisin maidir le gníomhaíochtaí iascaireachta eile de chuid an Aontais, lena n-áirítear an t-iascach áineasa, i gcás ina dtagraítear go sainráite don iascach sin sna forálacha ábhartha.

Airteagal 2 **Sainmhínithe**

Chun críocha an Rialacháin seo, tá feidhm ag na sainmhínithe a leagtar síos in Airteagal 4(1) Rialachán (AE) Uimh. 1380/2013. Ina theannta sin, tá feidhm ag na sainmhínithe seo a leanas:

- (a) ciallaíonn ‘uiscí idirnáisiúnta’ uiscí atá lasmuigh de cheannasacht nó de dhlínse aon Stáit;
- (b) ciallaíonn ‘iascach áineasa’ gníomhaíochtaí iascaireachta neamhthráchtála, lena saothraítear acmhainn bhitheolaíoch na mara, le haghaidh áineasa, turasóireachta nó spóirt;
- (c) ciallaíonn ‘gabháil iomlán incheadaithe’ (GII):
 - (i) in iascaigh atá faoi réir na díolúine ón oibleagáid gabhálacha a thabhairt i dtír dá dtagraítear in Airteagal 15(4) go (7) de Rialachán (AE) Uimh. 1380/2013, an chainníocht éisc a fhéadtar a thabhairt i dtír as gach stoc gach bliain;
 - (ii) sna hiascaigh eile uile, an chainníocht éisc a fhéadtar a ghabháil as gach stoc i gcaitheamh bliana
- (d) ciallaíonn ‘cuóta’ cion den GII a leithdháiltear ar an Aontas nó ar Bhallstát;
- (e) ciallaíonn ‘cuóta uathrialach de chuid an Aontais’ teorainn ghabhála a leithdháiltear go huathrialach ar shoithí iascaireachta de chuid an Aontais in éagmais GII comhaontaithe;
- (f) ciallaíonn ‘cuóta anailíseach’ cuóta uathrialach de chuid an Aontais a bhfuil measúnú anailíseach ar fáil ina leith;
- (g) ciallaíonn ‘measúnú anailíseach’ meastóireacht chainníochtúil ar threochtaí i stoc ar leith, bunaithe ar shonraí maidir le bitheolaíocht agus saothrú an stoic sin, ar léirigh athbhreithniú eolaíoch na sonraí sin a bheith de cháilíocht leordhóthanach chun comhairle eolaíoch a sholáthar i ndáil le roghanna maidir le gabhálacha amach anseo;
- (h) ciallaíonn ‘feiste comhthiomsaithe éisc’ (FAD) aon trealamh ar ancaire a bhíonn ar snámh ar dhromchla na farraige arb é is aidhm dó éisc a mhealladh.

Airteagal 3 **Limistéir iascaireachta**

Chun críocha an Rialacháin seo, tá feidhm ag na sainmhínithe seo a leanas maidir le limistéir iascaireachta:

- (a) ciallaíonn ‘folimistéir gheografacha CGIM’ na limistéir a shonraítear in Iarscríbhinn I a ghabhann le Rialachán (AE) 2023/2124 ó Pharlaimint na hEorpa agus ón gComhairle⁷;
- (b) ciallaíonn ‘an Mheánmhuir’ na huiscí i bhfolimistéir gheografacha CGIM 1 go 27 a shonraítear in Iarscríbhinn I a ghabhann le Rialachán (AE) 2023/2124;
- (c) ciallaíonn ‘an Mheánmhuir Thiar’ na huiscí i bhfolimistéir gheografacha CGIM 1, 2, 5, 6, 7, 8, 9, 10 agus 11 a shonraítear in Iarscríbhinn I a ghabhann le Rialachán (AE) 2023/2124;
- (d) ciallaíonn ‘Muir Aidriad’ na huiscí i bhfolimistéir gheografacha CGIM 17 agus 18 a shonraítear in Iarscríbhinn I a ghabhann le Rialachán (AE) 2023/2124;
- (e) ciallaíonn ‘Caolas na Sicile’ na huiscí i bhfolimistéir gheografacha CGIM 12, 13, 14, 15 agus 16 a shonraítear in Iarscríbhinn I a ghabhann le Rialachán (AE) 2023/2124;
- (f) ciallaíonn ‘an Mhuir Iónach’ na huiscí i bhfolimistéir gheografacha CGIM 19, 20 agus 21 a shonraítear in Iarscríbhinn I a ghabhann le Rialachán (AE) 2023/2124;
- (g) ciallaíonn ‘Muir na Leiveainte’ na huiscí i bhfolimistéir gheografacha CGIM 24, 25, 26 agus 27 a shonraítear in Iarscríbhinn I a ghabhann le Rialachán (AE) Uimh. 2023/2124;
- (h) ciallaíonn ‘Muir Alboran’ na huiscí i bhfolimistéir gheografacha CGIM 1, 2 agus 3 a shonraítear in Iarscríbhinn I a ghabhann le Rialachán (AE) 2023/2124;
- (i) ciallaíonn ‘an Mhuir Dhubh’ na huiscí i bhfolimistéir gheografach CGIM 29 a shonraítear in Iarscríbhinn I a ghabhann le Rialachán (AE) 2023/2124.

TEIDEAL II

DEISEANNA IASCAIREACHTA LE hAGHAIDH SOITHÍ IASCAIREACHTA DE CHUID AN AONTAIS

CAIBIDIL I

An Mheánmhuir

Airteagal 4 **An eascann Eorpach**

1. Tá feidhm ag an Airteagal seo maidir le folimistéir gheografacha CGIM 1 go 27, le huiscí goirt agus le fionnuiscí. Áirítear le huiscí goirt inbhir, murlaigh chósta agus uiscí trasdultacha.

⁷ Rialachán (AE) 2023/2124 ó Pharlaimint na hEorpa agus ón gComhairle an 4 Deireadh Fómhair 2023 maidir le forálacha áirithe i ndáil le hiascaireacht i limistéir Chomhaontú an Choimisiúin Ghinearálta Iascaigh don Mheánmhuir (CGIM) (athmhúnlú) (IO L, 2023/2124, 12.10.2023, ELI: <http://data.europa.eu/eli/reg/2023/2124/oj>).

2. Cuirfear toirmeasc ar ghabháil do ghníomhaíochtaí iascaireachta tráchtála le haghaidh eascanna Eorpacha (*Anguilla anguilla*) ar mó ná 12 cm a bhfad foriomlán, mar spriocspeiceas nó mar fhoghabháil de thaisme, ar feadh tréimhse 6 mhí in 2026 ar a laghad. Chuige sin, cinntídh gach Ballstát lena mbaineann tréimhse choiscthe amháin nó níos mó faoi réir an mhéid seo a leanas:

(a) i gcás inarb iomchuí, féadfaidh an tréimhse choiscthe nó na tréimhsí choiscthe a bheith éagsúil laistigh de Bhallstát amháin ó limistéar iascaireachta go chéile chun patrún imirce geografaí agus aimseartha na heascainne Eorpaí a chur san áireamh ag na céimeanna difriúla dá saolré;

(b) mairfidh an tréimhse choiscthe nó na tréimhsí choiscthe 6 mhí as a chéile ar a laghad, nó 6 mhí ar an iomlán i gcomhréir leis na coinníollacha a leagtar amach i mír 3;

(c) beidh an tréimhse choiscthe nó na tréimhsí choiscthe comhsheasmhach leis na cuspóirí caomhnaithe a leagtar amach i Rialachán (CE) Uimh. 1100/2007 ón gComhairle⁸, leis na pleananna náisiúnta bainistíochta atá i bhfeidhm agus le patrúin imirce aimseartha na heascainne Eorpaí ag an gcéim saoil lena mbaineann sa Bhallstát lena mbaineann.

3. Beidh an tréimhse choiscthe idir an 1 Eanáir agus an 31 Márta 2026, agus bunóidh gach Ballstát lena mbaineann tréimhse choiscthe bhreise 3 mhí idir an 1 Aibreán agus an 30 Samhain 2026.

4. Údarófar gníomhaíochtaí iascaireachta tráchtála le haghaidh eascanna Eorpacha ar lú ná 12 cm a bhfad foriomlán gach bliain ar feadh tréimhse 2 mhí, agus déanfaidh institiúid eolaíoch chomhaontaithe faireachán ar na gníomhaíochtaí iascaireachta sin agus déanfaidh sí maoirseacht ar bhailiú sonraí agus ar anailís sonraí.

5. An líon uasta údaruithe iascaireachta agus an líon uasta trealaimh éighníomhaigh atá údaraithe chun díriú ar eascanna Eorpacha ar lú ná 12 cm a bhfad foriomlán chun críoch tráchtála, ní rachaidh siad thar na leibhéil faoi seach a leagtar amach in Iarscríbhinn I.

6. Toirmiscfear iascach áineasa na heascainne Eorpaí ag gach céim dá saolré.

7. Déanfaidh gach Ballstát lena mbaineann an Coimisiún a chur ar an eolas:

(a) maidir leis an tréimhse choiscthe nó na tréimhsí choiscthe a chinn sé i gcomhréir le míreanna 2 agus 3, faoin 1 Márta 2026;

(b) laistigh de 2 sheachtain tar éis a nglactha maidir leis na bearta náisiúnta a bhaineann leis an tréimhse choiscthe nó na tréimhsí choiscthe a chinn sé i gcomhréir le míreanna 2 agus 3;

(c) maidir leis an tréimhse atá údaraithe chun iascaireacht a dhéanamh ar eascanna Eorpacha ar lú ná 12 cm a bhfad foriomlán i gcomhréir le mír 4, faoin 1 Márta 2026.

⁸ Rialachán (CE) Uimh. 1100/2007 ón gComhairle an 18 Meán Fómhair 2007 lena mbunaítear bearta chun an stoc eascann Eorpach a athbhunú, IO L 248, 22.9.2007, lch. 17, ELI: <http://data.europa.eu/eli/reg/2007/1100/oj>.

Airteagal 5
Coiréalach dearg

Tá feidhm ag an Airteagal seo maidir leis na gníomhaíochtaí uile a dhéanann soithí iascaireachta de chuid an Aontais i ndáil le saothrú coiréalaigh dheirg (*Corallium rubrum*) sa Mheánmhuir.

Le haghaidh iascaigh spriocdhírith, maidir leis an líon uasta údaruithe iascaireachta agus uaschanníochtaí stoc coiréalaigh dheirg a bhaineann soithí iascaireachta de chuid an Aontais agus a bhaintear trí ghníomhaíochtaí de chuid an Aontais, ní rachaidh an líon sin thar na leibhéil a leagtar amach in Iarscríbhinn II.

Airteagal 6
An dorád coiteann

1. Tá feidhm ag an Airteagal seo maidir leis na gníomhaíochtaí tráchtála uile a dhéanann soithí iascaireachta de chuid an Aontais a dhíríonn ar dhoráid choiteanna (*Coryphaena hippurus*) trí FADanna a úsáid sa Mheánmhuir.

Tá feidhm aige freisin maidir le hiascach áineasa dorád coiteann sa Mheánmhuir.

2. Leagtar amach in Iarscríbhinn III, pointe (a) an uasacmhainneacht cabhlaigh, arna sloinneadh ina líon soithí, ina kW agus ina holltonnáiste (GT), soithí iascaireachta de chuid an Aontais atá údaraithe le hiascaireacht a dhéanamh ar dhoráid choiteanna.

3. Leagtar amach in Iarscríbhinn III, pointe (b) an líon uasta FADanna in aghaidh an tsoithigh atá údaraithe le hiascaireacht a dhéanamh ar dhoráid choiteanna.

4. Ní shárófar leis an uasleibhéal gabhálacha dorád coiteann na leibhéil a leagtar amach in Iarscríbhinn III, pointe (c).

I gcás iascaigh áineasa, is éard a bheidh sa líon uasta gabhálacha 10 kg nó 5 iasc d'aon mhéid in aghaidh an duine in aghaidh an lae.

CAIBIDIL II

An Mheánmhuir Thiar

Airteagal 7
Stoic ghrinnill

1. Tá feidhm ag an Airteagal seo maidir leis na gníomhaíochtaí iascaireachta uile a dhéanann soithí iascaireachta de chuid an Aontais agus gníomhaíochtaí iascaireachta eile de chuid an Aontais lena ngabhtar stoic ghrinnill dá dtagraítear in Airteagal 1(2) de Rialachán (AE) 2019/1022 sa Mheánmhuir Thiar.

2. Leagtar amach an uasiarracht iascaireachta incheadaithe do thráláir agus do bháid spiléireachta in Iarscríbhinn IV, pointe 1. Déanfaidh na Ballstáit an uasiarracht iascaireachta incheadaithe a bhainistiú i gcomhréir le hAirteagal 9 de Rialachán (AE) 2019/1022 agus le hAirteagail 26 go 34 de Rialachán (CE) Uimh. 1224/2009.

3. Leagtar amach na huasteorainneacha gabhála le haghaidh séaclaí domhainmhara i Muir Alboran, ar na hOileáin Bhailéaracha, i dTuaisceart na Spáinne agus i Murascaill an Leoin in Iarscríbhinn IV, pointe 2(a).

4. Leagtar amach na huasteorainneacha gabhála le haghaidh séaclaí domhainmhara ar Oileán na Corsaice, sa Mhuir Liogúrach, i Muir Thoirian agus ar Oileán na Sairdíne in Iarscríbhinn IV, pointe 2(b).

5. Beidh leithdháileadh na ndeiseanna iascaireachta i measc na mBallstát a leagtar amach in Iarscríbhinn IV gan dochar do na nithe seo a leanas:

- (a) malartuithe arna ndéanamh de bhun Airteagal 16(8) de Rialachán (AE) Uimh. 1380/2013;
- (b) asbhaintí agus ath-leithdháiltí arna ndéanamh de bhun Airteagal 37 de Rialachán (CE) Uimh. 1224/2009;
- (c) gabhálacha breise arna gceadú faoi Airteagal 3 de Rialachán (CE) Uimh. 847/96 nó faoi Airteagal 15(9) de Rialachán (AE) Uimh. 1380/2013;
- (d) cainníochtaí arna gcoinneáil siar i gcomhréir le hAirteagal 4 de Rialachán (CE) Uimh. 847/96 nó arna n-aistriú faoi Airteagal 15(9) de Rialachán (AE) Uimh. 1380/2013;
- (e) asbhaintí arna ndéanamh de bhun Airteagail 105, 106 agus 107 de Rialachán (CE) Uimh. 1224/2009.

Airteagal 8
Sásra cúitimh

[IONADCHOINNEÁLAÍ]

Airteagal 9

Bearta ceartaitheacha

[IONADCHOINNEÁLAÍ]

Airteagal 10

Taifeadadh agus tarchur sonraí

1. Déanfaidh na Ballstáit taifead ar na sonraí maidir le hiarracht iascaireachta agus tarchuirfidh siad chuig an gCoimisiún iad i gcomhréir le hAirteagail 33 agus 34 de Rialachán (CE) Uimh. 1224/2009 agus Airteagail 146c, 146d agus 146e de Rialachán Cur Chun Feidhme (AE) Uimh. 404/2011 ón gCoimisiún¹⁰.

¹⁰ Rialachán Cur Chun Feidhme (AE) Uimh. 404/2011 ón gCoimisiún an 8 Aibreán 2011 lena leagtar síos rialacha mionsonraithe maidir le cur chun feidhme Rialachán (CE) Uimh. 1224/2009 ón gComhairle lena mbunaítear córas rialaithe de chuid an Aontais chun comhlíonadh rialacha an Chomhbheartais Iascaigh a áirithiú (IO L 112, 30.4.2011, lch. 1), ELI: http://data.europa.eu/eli/reg_impl/2011/404/oj.

2. Nuair a chuirfidh na Ballstáit faoi bhráid an Choimisiúin, de bhun Airteagail 33 agus 34 de Rialachán (CE) Uimh. 1224/2009, sonraí a bhaineann leis an iarracht iascaireachta, úsáidfidh siad na cóid grúpa iarrachta iascaireachta a leagtar amach in Iarscríbhinn IV.

CAIBIDIL III

Muir Aidriad

Airteagal 11

Stoic peiligeach beag

1. Tá feidhm ag an Airteagal seo maidir leis na gníomhaíochtaí iascaireachta uile a dhéanann soithí iascaireachta de chuid an Aontais lena ngabhtar sairdíní (*Sardina pilchardus*) agus ainseabhaithe (*Engraulis encrasicolus*) i Muir Aidriad.
2. Ní sháróidh an t-uasleibhéal gabhálacha sairdíní agus ainseabhaithe na leibhéil a leagtar amach in Iarscríbhinn V, pointe 1(a).
3. Leagtar amach in Iarscríbhinn V, pointe 1(b), an uasacmhainneacht cabhlaigh, arna sloinneadh ina kW, ina GT agus sa líon, soithí iascaireachta de chuid an Aontais atá údaraithe le hiascaireacht a dhéanamh ar stoic peiligeach beag.
4. Ní bheidh feidhm ag Airteagail 3 agus 4 de Rialachán (CE) Uimh. 847/96 i gcás ina n-úsáidfidh Ballstát an tsolúbthacht bliain go bliain dá bhforáiltear in Airteagal 15(9) de Rialachán (AE) Uimh. 1380/2013.

Airteagal 12

Stoic ghrinnill

1. Tá feidhm ag an Airteagal seo maidir leis na gníomhaíochtaí iascaireachta uile a dhéanann soithí iascaireachta de chuid an Aontais lena ngabhtar colmóirí Eorpacha (*Merluccius merluccius*), gliomaigh na hIorua (*Nephrops norvegicus*), sóil choiteanna (*Solea solea*), rós-séaclaí domhainmhara (*Parapenaeus longirostris*) agus lannaigh riabhacha (*Mullus barbatus*) i Muir Aidriad.
2. Leagtar amach in Iarscríbhinn V, pointí 2(a) agus 2(b), faoi seach, an uasiarracht iascaireachta incheadaithe le haghaidh na stoc grinnill sin, agus an uasacmhainneacht cabhlaigh faoi raon feidhme an Airteagail seo.
3. Déanfaidh na Ballstáit an uasiarracht iascaireachta incheadaithe a bhainistiú i gcomhréir le hAirteagal 26 go 35 de Rialachán (CE) Uimh. 1224/2009.

Airteagal 13

Tarchur sonraí

I gcás na n-iascach a rialáiltear le hAirteagail 11 agus 12, nuair a chuirfidh na Ballstáit faoi bhráid an Choimisiúin, de bhun Airteagail 33 agus 34 de Rialachán (CE) Uimh. 1224/2009, sonraí a bhaineann le gabhálacha a thabhairt i dtír agus le hiarracht iascaireachta, úsáidfidh siad na cóid stoic agus na cóid grúpa iarrachta iascaireachta a leagtar amach in Iarscríbhinn V.

CAIBIDIL IV

Caolas na Sicile

Airteagal 14

An colmóir Eorpach agus an rós-séacla domhainmhara

1. Tá feidhm ag an Airteagal seo maidir leis na gníomhaíochtaí uile a dhéanann soithí iascaireachta de chuid an Aontais agus gníomhaíochtaí iascaireachta eile de chuid an Aontais lena ngabhtar colmóirí Eorpacha (*Merluccius merluccius*) agus rós-séaclaí domhainmhara (*Parapenaeus longirostris*) i gCaolas na Sicile.
2. Leagtar amach in Iarscríbhinn VI, pointe 1(a) an uasacmhainneacht cabhlaigh, arna sloinneadh ina líon soithí, ina kW agus ina GT, soithí tráil grinnill atá údaraithe le hiascaireacht a dhéanamh ar stoic ghrinnill, laistigh de raon feidhme an Airteagail seo.
3. Leagtar amach in Iarscríbhinn VI, pointe 1(b) an uasiarracht iascaireachta incheadaithe le haghaidh colmóirí Eorpacha (ina líon na laethanta iascaireachta), maidir le soithí tráil dobharchú grinnill (OTB) a dhíríonn ar cholmóirí Eorpacha.
4. Ní sháróidh an t-uasleibhéal gabhálacha rós-séaclaí domhainmhara na leibhéil a leagtar amach in Iarscríbhinn VI, pointe 1(c).
5. Déanfaidh na Ballstáit an uasiarracht iascaireachta incheadaithe a bhainistiú i gcomhréir le hAirteagail 26 go 35 de Rialachán (CE) Uimh. 1224/2009.

Airteagal 15

Séaclaí domhainmhara

1. Tá feidhm ag an Airteagal seo maidir leis na gníomhaíochtaí iascaireachta uile a dhéanann soithí iascaireachta de chuid an Aontais agus gníomhaíochtaí iascaireachta eile de chuid an Aontais lena ngabhtar séaclaí móra dearga (*Aristaeomorpha foliacea*) agus séaclaí gorma agus dearga (*Aristeus antennatus*) i gCaolas na Sicile.
2. Leagtar amach in Iarscríbhinn VI, pointe 2(a) an uasacmhainneacht cabhlaigh, arna sloinneadh ina líon soithí, ina kW agus ina GT, soithí tráil grinnill atá údaraithe le hiascaireacht a dhéanamh ar stoic ghrinnill, laistigh de raon feidhme an Airteagail seo.
3. Ní sháróidh an t-uasleibhéal gabhálacha séaclaí domhainmhara na leibhéil a leagtar amach in Iarscríbhinn VI, pointí 2(b) agus (c).

Airteagal 16

Tarchur sonraí

Nuair a chuirfidh na Ballstáit faoi bhráid an Choimisiúin, de bhun Airteagail 33 agus 34 de Rialachán (CE) Uimh. 1224/2009, sonraí a bhaineann le cainníochtaí na stoc arna ngabháil a thabhairt i dtír, úsáidfí siad na cóid stoic a leagtar amach in Iarscríbhinn VI.

CAIBIDIL V

An Mhuir Iónach agus Muir na Leiveainte

Airteagal 17

Séaclaí domhainmhara

1. Tá feidhm ag an Airteagal seo maidir leis na gníomhaíochtaí iascaireachta uile a dhéanann soithí iascaireachta de chuid an Aontais agus gníomhaíochtaí iascaireachta eile de chuid an Aontais lena ngabhtar séaclaí móra dearga (*Aristaeomorpha foliacea*) agus séaclaí gorma agus dearga (*Aristeus antennatus*) sa Mhuir Iónach agus i Muir na Leiveainte.
2. Leagtar amach in Iarscríbhinn VII, pointí 1(a) agus 2(a), an uasacmhainneacht cabhlaigh, arna sloinneadh ina líon soithí, ina kW agus ina GT, soithí tráil grinnill atá údaraithe le hiascaireacht a dhéanamh ar shéaclaí domhainmhara dá dtagraítear san Airteagal seo.
3. Ní sháróidh an t-uasleibhéal gabhálacha séaclaí domhainmhara dá dtagraítear san Airteagal seo na leibhéil faoi seach a leagtar amach in Iarscríbhinn VII, pointe 1(b), pointe 1(c), pointe 2(b) agus pointe 2(c).

CAIBIDIL VI

Muir Alboran

Airteagal 18

An deargán

[IONADCHOINNEÁLAÍ]

CAIBIDIL VII

An Mhuir Dhubh

Airteagal 19

An salán

1. Tá feidhm ag an Airteagal seo maidir leis na gníomhaíochtaí uile a dhéanann soithí iascaireachta de chuid an Aontais agus gníomhaíochtaí iascaireachta eile de chuid an Aontais lena ngabhtar saláin (*Sprattus sprattus*) sa Mhuir Dhubh.
2. Ní sháróidh cuóta uathrialach an Aontais le haghaidh salán na leibhéil a leagtar amach in Iarscríbhinn IX.
3. Ní bheidh feidhm ag Airteagail 3 agus 4 de Rialachán (CE) Uimh. 847/96 i gcás ina n-úsáidfidh Ballstát an tsolúbthacht bliain go bliain dá bhforáiltear in Airteagal 15(9) de Rialachán (AE) Uimh. 1380/2013.

Airteagal 20

An turbard

1. Tá feidhm ag an Airteagal seo maidir leis na gníomhaíochtaí uile a dhéanann soithí iascaireachta de chuid an Aontais agus gníomhaíochtaí iascaireachta eile de chuid an Aontais lena ngabhtar turbaird (*Scophthalmus maximus*) sa Mhuir Dhubh.
2. Leagtar amach in Iarscríbhinn IX an GII le haghaidh turbard is infheidhme in uiscí an Aontais sa Mhuir Dhubh, leithdháileadh an GII sin i measc na mBallstát agus, i gcás inarb iomchuí, na coinníollacha atá nasctha go feidhmiúil leis sin.
3. Ní bheidh feidhm ag Airteagail 3 agus 4 de Rialachán (CE) Uimh. 847/96 i gcás ina n-úsáidfídh Ballstát an tsolúbthacht bliain go bliain dá bhforáiltear in Airteagal 15(9) de Rialachán (AE) Uimh. 1380/2013.

Airteagal 21

Iarracht iascaireachta le haghaidh turbard a bhainistiú

Maidir le soithí iascaireachta de chuid an Aontais atá údaraithe le hiascaireacht a dhéanamh ar thurbaird faoi chuimsiú Airteagal 20, gan beann ar fhad foriomlán na soithí, ní rachaidh siad thar 180 lá iascaireachta in aghaidh na bliana.

Airteagal 22

Tréimhse choiscithe le haghaidh turbard

Toirmeascfar ar shoithí iascaireachta de chuid an Aontais aon ghníomhaíocht iascaireachta a dhéanamh, lena n-áirítear turbaird a thrasloingsiú, a choinneáil ar bord, a thabhairt i dtír agus a dhíol den chéad uair, in uiscí an Aontais sa Mhuir Dhubh ón 15 Aibreán go dtí an 15 Meitheamh 2026.

Airteagal 23

Forálacha speisialta maidir le leithdháileadh na ndeiseanna iascaireachta sa Mhuir Dhubh

Beidh leithdháileadh na ndeiseanna iascaireachta i measc na mBallstát a leagtar amach in Iarscríbhinn IX gan dochar do na nithe seo a leanas:

- (a) malartuithe arna ndéanamh de bhun Airteagal 16(8) de Rialachán (AE) Uimh. 1380/2013;
- (b) asbhaintí agus ath-leithdháiltí arna ndéanamh de bhun Airteagal 37 de Rialachán (CE) Uimh. 1224/2009;
- (c) asbhaintí arna ndéanamh de bhun Airteagail 105 agus 107 de Rialachán (CE) Uimh. 1224/2009.

Airteagal 24

Tarchur sonraí

Nuair a chuirfidh na Ballstáit faoi bhráid an Choimisiúin, de bhun Airteagail 33 agus 34 de Rialachán (CE) Uimh. 1224/2009, sonraí a bhaineann le cainníochtaí na stoc salán agus turbard arna ngabháil in uiscí an Aontais sa Mhuir Dhubh a thabhairt i dtír de bhun Rialachán Uimh. 1224/2009, úsáidfídh siad na cóid stoic a leagtar amach in Iarscríbhinn IX a ghabhann leis an Rialachán seo.

TEIDEAL III

FORÁLACHA CRÍOCHNAITHEACHA

Airteagal 25

Teacht i bhfeidhm agus cur i bhfeidhm

Tiocfaidh an Rialachán seo i bhfeidhm an lá tar éis lá a fhoilsithe in *Iris Oifigiúil an Aontais Eorpaigh*.

Beidh feidhm aige ón 1 Eanáir 2026 go dtí an 31 Nollaig 2026.

Arna dhéanamh sa Bhruiséil,

*Thar ceann na Comhairle
An tUachtarán*